

龔定盦全集

定盦文集

仁和龔自珍璣人撰

卷中

家塾策問一道

問周禮保氏掌教國子以六書外史掌達書名於四方瞽史諭書名六書學三代綦重之矣古今異體或始或改自倉頡史籀以降至於炎漢書凡幾變可得而陳與漢安帝時許沖上其父南閣祭酒愼說文解字十四篇此古今書名之大宗也法後王以小篆爲質以何體爲埒見例可得而聞與說文形書也顧一字有一字之形與一字之音與義而後一篆完故說者曰爾雅廣雅義書也聲類音書也然則歧而爲三抑治說文而經緯備舉也能發其凡與以字義而論一字有一字之本義有引申之義有段借之義往往引伸段借之義通行於古今而本義反晦

者能約畧舉之與六書之目有體有用孰爲四體孰爲二用能了然胸口與二用中之段借由古人字少固也但段借亦必中師法能言其樞紐與周末漢初經師口授不著竹帛又或用方言是故羣經異師則異字自胡母生之治春秋而已然矣說文僂經與羣書之僂經異好古者又據許以改經未見其可也能言原委曲折與許之言六書與鄭衆之言六書與劉歆班固之言六書次第小不合形聲與諧聲殊趣能疏別與今音古分十七部秦以前有均之文可覆按也若依聲以臆許之九千字不獨形聲字而以部分釐之亦古今之奇作也能說其例與許書所有之字當時俗字固不闕入乃羣經所有之正字亦頗有不收者况本書見於說解則有之篆文則無之所從得聲則有之本聲則無之此自有其故也豈可盡以某字卽某字當之與玉

篇以降可羽翼說文者凡幾家或謂呂忱字林及字苑諸作雖不作可也信與唐人說經著者孔賈陸三家其於小學之理謂不及近儒可也曰茫乎未之聞然與不與古均各家疎於十七部者十部十三部也密於十七部者十八部二十一部也枝派義例之不同能臚其八出歟六書爲小學之一門聲又爲六書之一門等均之學又爲聲中之一門然則談古均者胡爲而不屑談等均也抑治經未暇與意者謂古均足裨經讀而等均爲餘事不知古均明而經明其體尊等均明而天下之言語明語言亦文字也其用大能一以貫之與郭忠恕汗簡夏竦古文四聲韻博采古文何其夥也往往爲凡將急就滂熹元尙訓纂所未及俱可信而奉之以補許氏古文之闕抑真偽雜出也能一言決之歟周時吉金近世出土頗夥習鼎太僕盤而外其足證

古文者有幾事賦秦漢金石往往非篆非隸意者割二分畱八分之說未盡無稽與夫解經莫如字也解字莫如經也韓氏曰讀書略識字古未有不明乎字而稱經生者也諸生治經之日久矣心知其意者其縱言之

陳碩甫所箸書序

孔子曰吾道一以貫之故記曰黃帝正名百物以明民共財告仲由曰名不正則言不順言不順則事不成禮樂不興刑罰不中子游曰有始有卒者其惟聖人乎古者八歲入小學教之數與方名與其灑掃進退之節保氏掌國子之教有書有數六書九數皆謂之小學由是十五入大學乃與之言正心誠意以推極於家國天下壯而爲卿大夫公侯天下國家名實本末皆治後世小學廢專有大學童子入塾所受卽治天下之道不則窮

理盡性幽遠之言大書九數白首未之聞其言曰學當務精者
鉅者凡小學家言不足治治之爲細儒於是君子有憂之憂上
達之無本憂逃其難者之非正不由其始者終不得究物之命
於是黜空談之聰明守鈍樸之迂迴物物而名各不使有遁其
所陳說艱難算師疇人則積數十年之功始立一術書師則繁
稱干言始曉一形一聲之故求之五經三傳子史之文而畢合
乃宣於楮帛而且一戶牖必求其異向也一脯醢必求其異器
與時也一衣裳必求其異尺寸也有高語大言者拱手避謝極
言非所當於是二千載將墜之法雖不盡復什存三四愚瘁之
士尋之有門徑繹之有端緒蓋整齊而比之之力至苦勞矣陳
碩甫曰是苦且勞者有所甚企待於後後孰當之則乃所稱聞
性道與治天下者也乃言曰使黃帝正名而不以致上世之理

孔子之正名而終不能以典禮而齊刑則六藝爲無用而古之
儒之見詬與詬古之儒者齊類彼涉顛而棄本此循本而忘顛
庸愈平且吾不能生整齊之之後旣媾吾力而重負企待者於
是始以六書九數之術及條禮家曲節碎文如干事推之欲遂
以通於治天下大凡某書如千篇如千卷某書如千卷都如千
卷如目錄兵部主事姚先生曰今天下得十數陳碩甫分置各
行省授行省學弟子天下得百十巨弟子分教小弟子國家進
士必於是乎取則至教不躡等且性與天道之要或基之聞矣
中書胡先生曰使碩甫自信所推舉無闕請從姚先生之言所
推猶有闕則姑舍是言整齊益整齊企待益企待總之必不爲
虛待無歧謬是二言者龔自珍皆聞之因最錄書指意皆識之
答人求墓銘書

藏幽之有文又從而飾其詞炎漢以來未有改也顧禮何心哉
吾遇人求請藏幽之文輒心動不情戚其容與區別其狀之詞
而來者弗許也情戚而來者亦戚而應之悵悵鋪敘旣成意尙
未能和何哉古之始爲是制者何心哉雖巨富貴重以賢聖至
於股湯猶不能以爭天下古今之勢故詩曰高岸爲谷深谷爲
陵仁人者姑盡吾愛以附不欲速朽之義謂夫功德文章行誼
之蹟與其有令聞之子孫具於辭冀哀而掩之掩之者誰與至
於冀夫掩之也而尙忍問與仁人孝子其遂忍逆計至於是抑
又忍弗計至是與是求請者與爲文者所皆艱言也而乃昌昌
愉愉以命之從夫乞爲傳爲誄之義同與甚者辭曰或錫之誄
或錫之傳或錫之誌銘詞體如是固若是其易而無擇與君家
有世德法宜爲文章又辱吾子諉責不可辭而植不忍爲誌銘

謹撰上墓表

西域置行省議

天下有大物渾員曰海四邊見之曰四海四海之國無算數莫大於我

大清

大清國堯以來所謂中國也其實居地之東東南臨海西北不臨海書契所能言無有言西北海狀者今西極徼至愛烏罕而止北極徼至烏梁海總管治而止若乾路若水路若大山小山大川小川若平地皆非盛京山東閩粵版圖盡處卽是海比西域者釋典以爲地中央而古近謂之爲西域矣我

大清

肇祖以來宅長白之山天以東海昇

大清最先

世祖入關盡有唐堯以來南海東南西北設行省者十有八方計二萬里積二百萬里古之有天下者號稱有天下尙不能以有一海博聞之士言廓恢者攢勿信於北則小諭望見之於西北正西則大諭望而不見今

聖朝旣全有東南二海又控制蒙古喀爾喀部落於北不可謂
諭

高宗皇帝又應天運而生應天運而用武則遂能以承

祖宗之兵力兼用東南北之衆開拓西邊遠者距京師一萬七千里西藩屬國尙不預則是天遂將通西海乎未可測矣然而用帑數千萬不可謂費然而積

兩朝西顧之焦勞軍書百尺不可謂勞八旗子弟綠旗延賤感

遇而捐軀不可謂折然而微夫

天章聖訓之示不得已淺見愚儒下里鄙生幾幾以耗中事邊
疑

上之智窮人之國滅人之嗣赤地千里疑

上之仁否否有天下之道則貴乎因之而已矣假如鄙儒言勞
者不可復息費者不可復收滅者不可復續絕者不可復蘇則
亦莫如以因之以爲功况乎斷非如鄙儒言因功而加續之所
憑者益厚所藉者益大所加者益密則豈非天之志與

高宗之志所必欲遂者哉欲因功而續加之則莫如酌損益之
道何謂損益之道曰人則損中益西財則損西益中兩言而已
矣今中國生齒日益繁氣象日益隘黃河日益爲患大官非不
憂主上非不諮而不外乎開捐例加賦加鹽價之議譬如割臂

以肥腦自啖自肉无受代者自乾隆末年以來官吏土民狼狽
狼麇不土不農不工不商之人十將五六又或殍於草習邪教
取誅戮或凍餒以死終不肯治一寸之絲一粒之飯以益人承
乾隆六十載太平之盛人心慣於泰侈風俗習於游蕩京師其
尤甚者自京師始槩乎四方大拓富戶變貧戶貧戶變餓者四
民之首奔走下賤各省大局岌岌乎皆不可以支月日奚暇問
年歲嘉峪關以外鎮將如此其相望也戊卒如此其夥也燧堡
如此其密也地縱數千里部落數十支除沙磧外屯田總計北
纔二十三萬八千六百三十二畝南纔四萬九千四百七十六
畝合計纔二十八萬八千一百零八畝田丁南北合計纔十萬
三千九百零五名加遺犯有名無實者二百零四名若云以西
域治西域則言之胡易易今內地貴州一省每歲廣東四川皆

解餉以給貴州無重兵官精兵糧入不償出每歲

國家賠出五六萬兩至八九萬兩不等未嘗食貴州之利內地如此新疆尙何論邪應請大募京師游食非土著之民及直隸山東河南之民陝西甘肅之民令西徙除大江而南筋力柔弱道路險遠易以生怨無庸議雲南貴州兩湖兩廣相距亦遠四川地廣人希不宜再徙山西號稱海內最富土著者不願徙毋庸議雖毋庸議而願往者皆往其餘若江南省鳳潁淮徐之民及山西大同朔平之民亦皆性情強武敢於行路未驕慣於食稻衣蠶地尙不絕遠募之往必願往江西福建兩省種菸草之奸民最多大爲害中國宜盡行之無遺類與其爲內地無產之民孰若爲西邊有產之民以耕以牧得長其子孫哉當行者官給每戶盤費若干每丁盤費若干議聞又各省駐防旗人生齒

日繁南漕不給大率買米而食買緞而衣若遣令回旗京師內
城不能容若再生育數年本省費又無所底駐防者所以衛
天朝也八旗子弟受

恩久忠義其所性成苟有利於

天朝者必無異心無異議也各將軍議酌每大省行若干丁中
下省行若干丁盤費宜視民人加重以示優厚議聞其遷政暫
設大臣料理之七年停止議聞先期斬危崖劃仄嶺引淙泉瀉
漫壑到西分甬南北兩路後官給蒙古帳房一間牛犁具籽種
備先給大戶如千丈中戶如千丈下戶如千丈不得自占旗民
同例除沙磧不報墾外每年一奏開墾之數十年再奏總數二
十年彙查大數每年粟麩稞蔬皆入其十分之一貯於本地倉
以給糧俸其地丁錢賦應暫行免納俟二十年後再如內地交

穀外另有丁賦例有丁賦後再定解部額現在交粟麩暫勿折收銀錢亦俟二十年後再如內地折銀錢例設兵部尚書右都御史準回等處地方總督一員兵部侍郎右副都御史準回等處地方巡撫一員

或如直隸四川例以督兼撫不立撫似亦可

布政使一員按察使

一員巡道三員提督一員總兵官三員知府十一員知直隸州

三員知州二員知縣四十員府州之目十有四曰伊東府曰伊

西府伊犁東西路也曰庫州府庫爾喀喇烏蘇也曰迪化府烏

魯木齊也

原設州

曰鎮西府巴爾庫勒也

原設

曰瓜州府哈密也曰

塔州直隸州塔爾巴噶台也以上北路曰開州府闕展也曰沙

州府哈拉沙拉及庫車沙雅爾也曰蘇州府阿克蘇及賽喇木

也曰羌州府葉爾羌也曰和州府和闐也曰吐蕃直隸州烏什

也曰磚房直隸州喀什噶爾也以上南路伊東府設縣四以府

城爲伊東縣以烏哈爾里克爲綏定縣以博羅塔拉爲博縣以
幹珠罕爲珠縣四至核議伊西府設縣四以府城爲伊西縣以
庫爾圖爲圖縣以古爾班薩里爲絜縣以烘郭爾鄂籠爲鄂縣
四至核議庫州府設縣三以府爲庫縣以烏里雅蘇圖爲舊營
縣以晶河爲豐潤縣四至核議瓜州府設縣四以府城爲瓜縣
以蘇木哈喇咳爲舊堡縣以密巴什達里雅爲湖縣以塔勒納
必爲土城縣四至核議塔州設縣二以州爲塔縣以雅爾爲肇
豐縣四至核議其鎮西迪化兩府現在章程已善毋庸改議南
路開州府設六縣以府城爲開縣以納呼爲東關縣以洪城爲
洪縣以魯克察克爲柳中縣以哈喇和卓爲高昌縣以吐爾番
爲安樂縣四至核議沙州府設州一縣四以府爲沙縣以庫車
爲龜茲縣以碩爾楚克爲舊城縣以託和爾爲蘆縣以沙雅爾

爲沙城縣四至核議蘇州府設州一縣五以府爲蘇縣以賽喇木爲毗羅州以帕爾滿爲帕縣以託克三爲四村縣以拜城爲拜縣以庫什塔木爲小城縣四至核議羌州府設五縣以府爲羌縣以巴爾楚克爲新遷縣以呼拉瑪爲瑪平縣以哈喇古哲什爲哲縣以裕勒里雅克爲西夜縣四至核議和州府設四縣以府城爲球縣以皮什雅爲琳縣以玉隴哈什爲琅縣以博羅齊爲玕縣四至核議吐蕃州設縣二以州爲明定縣以森尼木爲森縣磚房州設縣三以州爲磚房縣以塞爾門爲塞門縣以英噶薩爾爲依耐縣四至核議武官副將以下文官同知以下應如千員另議總督駐劄伊東府巡撫駐劄迪化府提督駐劄迪化府分巡安西北兵備道一員分鎮安西北鎮總兵官一員同駐劄鎮西府分巡天山北兵備道一員駐劄伊東府分鎮天

山北鎮總兵官一員駐劄增州分巡天山南兵備道一員駐羌州府分鎮天山南鎮總兵官一員駐吐蕃州

非闕州屬之安樂縣

督撫必

皆駐北路者北可制南南不可制北昔者回部未隸

天朝無不甘心爲準夷役者亦國勢然也設采辦紅銅事務監督一員用內務府人員三年更調駐劄吐蕃州其甘肅省嘉峪關設監督一員專司內地往準回販易之稅除稻米鹽茶大黃布綢外一切中國奇淫之物不許出關以厚其俗除皮貨西瓜外不許入關以豐其聚銅務關務皆所以劑官俸給兵糈也其哈密關展兩郡王皆賞給協辦府事官各號朔望祭祀及大禮排班在道府之下同知之上各回城伯克中皆遴選一員賞給協辦縣事各號朔望祭祀及大禮排班在知縣之下縣丞之上甘肅省以安西南路爲盡境準回省以安西北路爲首境立界

石新遷人等及旗人回人等未能知書應請於三十年後立學宮設生員舉鄉試現在毋庸議其鎮西迪化現已設立姑仍舊交巡撫考試戈壁無水草處地方官踏看有可斂采金屑之地酌立條規奏聞官缺在北路者及臨戈壁者設風沙邊缺如內地煙瘴邊缺之例速其升調凡近磧之郊處處設立風神祠泉神祠歲時致祭仰視上帝地出其泉風息於天以宜蔬宜稞頒祝文焉大郭勒之在祀典者應幾處核議大達巴之在祀典者應幾處核議文移官事往來經戈壁皆帶泉水應頒製西洋奇器物小受多利行者又宜頒設高廣護風之具田中可用者

詳

山民人

王錫議令仿造夫然而屯田可盡撤矣屯田者有屯之名不盡

田之力三代既遠欲兵與農之合欲以私力治公田蓋其難也應將見在屯田二十八萬畝零卽給與見在之屯丁十萬餘人

作爲世業公田變爲私田客丁變爲編戶戍邊變爲士著其遺
犯毋庸釋回亦量予瘠地一體耕種交納旣撤綠旗之屯當撤
八旗之成中國駐防旗人往者別立冊籍以別於民戶回戶旣
有旗戶名目與回民有田籍者同故撤之而不患無所歸也應
請將將軍副都統辦事大臣領隊大臣印房章京等一概裁撤
其駐防之滿洲索倫錫伯蒙古弁丁等戍安西北路者作爲安
西北路旗戶在天山北路者作爲天山北路旗戶南路者作爲
南路旗戶伊犁將軍所領兵最多伊東伊西地亦最大出之行
陳散之原野勢便令順無不給之患應與自內地駐防旗人新
移到者一體歸地方官管轄但有事不得受知縣以下杖責交
納時應比民戶回戶酌減十分之二以償世僕之勞如是則又
慮其單也應請設立辦事大臣一員駐南路極邊羌和二州之

地統領滿洲兵九百名蒙古索倫兵七百名錫伯兵四十名綠旗兵六百名共計二千二百四十名以控藩部之布魯特哈薩克那本于愛烏罕各國掌各國之朝貢之務鑄總統西邊辦事大臣印一勅文一秩正二品受準回總督節制與提督巡撫互相節制布政使以下具中文總兵官以下帶刀見以昭威重其駐防兵丁於現在議裁徹者遴留至銳者其軍裝器械月餉應照內地江甯荊州例歲一閱三歲總督一閱十歲請

旨派威重大臣來西一大閱布魯特哈薩克之人咸侍是爲

天朝中外大疆界處以上各議現在所費極厚所建極繁所更張極大所收之効在二十年以後利且萬倍夫二十年非

朝廷必不肯待之事又非四海臣民望治者不及待之事然則一損一益之道一出一入之政國運盛益盛國基固益固民生

風俗厚益厚官事辦益辦必由是也無其次也其非順

天心究

祖烈劑大造之力以統利夫東西南北四海之民不在此議謹
議

擬進上蒙古圖志表文

臣伏處下土之列縱觀史冊之盛翹首 昭代之蹟遊心官書

之府仰 天章之有爛測地輿之至蹟我 朝之盛乃自羲炎

堯禹以降文儒武臣目所不能殫耳所不能聞帝者號令所不

能逮史官文章所不能記有一臣於此遭遇 隆代明聰特達

能通文學能見官書能考官書能見檔冊能考檔冊能鉤稽補

綴能遠遊能度形勢能通語言文字能訪問能彊記能思慮能

屬詞比事信或有之其福甚大求之先士無有倫比者也臣珍

檮昧乃非其倫竊見 國朝自西域邊平後有 欽定西域圖
志五十卷專紀準部回部山川種系聲音文字及於 國朝所
施設政事著錄 文淵閣副墨在杭州鎮江揚州既富既鉅永
永不朽臣攷前史動稱四海西北兩海並曰蓋闕我 朝之有
天下聲教號令由回部以達於葱嶺嶺外屬國之愛烏罕那木
干以迄於西海由蒙古喀爾喀四部以達於北方屬國之鄂羅
斯以迄於北海回部爲西海內衛喀爾喀爲北海內衛今葱嶺
以內古城郭之國既有成書而蒙古獨靈丹呼圖圖滅爲牧廠
其餘五十一旗及喀爾喀四大部縱橫萬餘里臣妾二百年其
間所施設英文鉅武與其高山異川綑大之事未有志遂敢俯
管削簡編理其迹闡豁其文作爲蒙古圖志爲圖二十有八爲
表十有八爲志十有二凡三十篇私家著述所得疑漏不敢仰

與官脩各件絜短長於萬一顧見 欽定四庫書目著錄文淵
者於下土私述問蒙俛采不遺其勤凡若干種竊願是書他日
附官書以傳得箸錄四庫之末簡則無其才也而福與之並矣
述曰

聖祖

高宗文冠古后嗣而比之武文咸富述天章志弟一

滿洲祭天則有禮書茂彼北裔亦攷厥圖述禮志弟二

古舞侏儻廟門之下號嘈者何以侑詐馬述樂志弟三

人戴北斗中言匪西出地入地測之用圭述晷度志弟四

內四十九如康田功附土默特西旗旣同述旗分志弟五

如古康侯盟用刑牛畫社爲六理藩所區述會盟志弟六

有哲卜尊北方大師如宗喀巴宏於西陲述象教志弟七

摩騰演漢章佳贊聖彼禰此宏本師所印述譯經志第八

小東大東潏潏烏龍亦有北海厥受則同述水地志第九

古兀落素今也卡倫匪愛其獸以陸人民述臺卡志第十

貢用九白始自崇德王會徵之如典屬國述職貢志第十一

教駢攻駒詰儒失傳北方大政以牧代佃述馬政志第十二

斯者託忒不資豪毛 國書因之落葉龍艘述字類表第十三

民生啞啞後立文字聲在形先我聰厥際述聲類表第十四

天子命輿地則必書曰討曰巡請詹起居述臨莅表第十五

梁梁中原有削有吞浩彼諸藩豈無革沿述沿革表第十六

林丹旣夷旁支具安如鄂承不雲初磬磬述氏族表第十七

收其大人扈入居庸固山梅勒轄是功宗述在旗氏族表第十八

八

愛猷之遜高三百年天聰以前系闕弗全述世系表第十九
古備封建聖不得已因庫自然匪我錫祀述封爵表第二十
碩矣天姬爲之哈屯禮官擇言匪古和婚述釐降表第二十一
準有鄂拓蒙古之旗如我京城叅佐所泊述旗職表第二十二
推河二族今則烏蘭名曰寄牧牛羊冥然述寄爵表第二十三
濟農岱青其汗其王漠南視之以爲朔方述喀爾喀總表第二十四

帝妣天姬再世降靈匪戚伊勳總於

廟庭述賽因諾顏

總表第二十五

民貴見幾智者全生四衛拉特爾安爾榮述新遷之杜爾伯特
表第二十六

管也五族今也二存督之縣之臣有瑰文述四衛拉特總表第

二十七

唐努之山爲北陽國臣請上言置札薩克述烏梁海表第二十

八

帝平羅剎嘗用其人海西漠北厥居婁遷述巴爾虎表第二十

九

藐吐谷渾五部無統和碩少文台吉之總述青海蒙古表第三

十

囊欽吉思逐蘇勒坦何如今朝玉茲奉版附述哈薩克爲

一表

抱羊乞錢西東奉藩借哈薩克拱我天山附述布魯特爲

一表

以上二表用前編徐松所述

道光元年十一月朔內閣中書龔自珍撰表

蒙古像教志序

夫染衣出家沙彌之律也肉食不淨大慧之聞也諸肉勿食泥
洹之訓也讚歎毀戒波旬之徒也然其生於邊地不生地穀以
畜牧爲耕作以血肉爲養飢宗教旣黃相沿已久有乖壞色之
訓聊別白衣之儔戒或遮之教必諒之蒙古五十一旗及喀爾
喀四部皆宗黃教黃教之祖曰宗喀巴若具云者租翰卡巴羅烏翰阿河鄂
補匝查阿昂阿克阿也自稱文殊師利之瑚必勒罕生干額納特珂
克地而唐古特庫車淖爾四衛拉特之地遍相宗祖其法嗣之
派繁衍難備述述兩大支曰在藏坐牀者曰到蒙古住持者在
藏坐牀者又分兩支宗喀巴第一弟子曰根敦珠巴實弟五十
四輩之達賴喇嘛是爲舍位出家之第一輩遞傳至七輩噶爾
藏加莫磋當準噶爾擾藏時

聖祖救其亂噶爾藏加莫磔避至青海坐牀

聖祖送之俾歸于藏至今傳付不絕皆以其呼必勒罕爲之此一支也第二弟子號爲班禪額爾德尼名曰刻珠尼曲結若具云者刻珠尼馬曲結嘉勒布格爾也至第四輩名羅卜藏曲結嘉勒燦者始與蒙古通自蒙古至盛京受我

太宗皇帝冊封歸死後其瑚必勒罕遂有喀木之地又九傳矣此一支也兩支外又有兩小支一曰紅帽噶瑪巴一曰黑帽沙瑪納皆稱呼圖克圖避達賴班禪位號沙瑪納呼圖克圖之後曰就衰滅噶瑪巴之後近世有林沁班珠爾者稱沙布嚨於庫車淖爾爲庫車淖爾察罕諾門之屬僧則並不敢號呼圖克圖矣其來蒙古住持者又分三支最先者曰帕克巴巴喇密特是其道北行之始凡六傳至元順帝時阿難達瑪第喇嘛與帝爭

政事怒而歸于唐古忒中絕凡八九十年而索諾木札木蘇重至又十餘傳至邁達哩止爲一支宗喀巴有弟三傳嫡嗣曰蘇爾第其瑚畢勒罕託生喀爾喀地方僧哲卜尊丹巴呼圖克圖又兩傳進丹舒克於世祖朝至今凡十六次瑚必勒罕號位亞於西藏之達賴而幾與班禪埒又一支也康熙間有喇嘛章佳胡圖克圖自藏來朝其人乃是第六輩達賴羅卜藏札木蘇之支嗣

聖祖優禮之命其住持于多倫諾爾之彙宗寺其第一次瑚必勒罕

世宗優禮之命其住持多倫諾爾之善因寺其第三次瑚必勒罕賜對

高宗朝大加獎異命其來京更定大藏經咒應真名號乃取自

後漢至唐各譯主所譯悉以今藏語更校成又以其國首楞嚴
已凸借此土本四譯而歸又佐莊親王辦理同文韻統於四十
一年跌逝京師今又再瑚必勒罕矣是最盛而最後出又一支
也五支之徒其論輪迴因果報應與古德神不滅論合其論劫
初形狀天地衆生日月種種成立種種出生次序與樓炭經合
其書與符印明合其念咒與聲明合自漢以來譯經之例例不
翻咒疏抄之例亦不妄釋咒是密語咒是秘印佛無秘密義有
秘密語既不譯不疏徒恃音準音若不準妙陀羅尼雖誠求之
亦恐迂寫矣今按自修多羅至優波提舍各有神咒小者取用
禁制神鬼作諸幻術大乘之咒三世諸佛由此出興不可思議
具如首楞嚴說且凡外道六師亦能幻出宮殿天龍女樂大火
大水乃至幻一日嶺成極長幻長曰促成剎那境界種種靈怪

咒聲靈故符佛口故又凡人世所求年命五欲誦咒皆得咒聲
靈故符佛口故以上之事天竺神僧生于拉撒視爲固然卽蒙
古道高喇嘛尙能近似而此震旦耳根非劣耳識非殊雖有高
僧不臻神悟故撰象教志專以推尊因明門中聲明二門而非
讚歎夫食肉衣黃墮邪師見也

蒙古水地志序

河鹵來受者三部曰烏喇忒曰鄂尔多斯曰歸化城土默特羣
水南來受者七部曰喀喇沁曰土默特曰敖漢曰奈曼曰翁牛
特曰巴林曰喀尔喀左翼水東行入黑龍江未至句經大川四
曰潢河曰大遼河曰諾尼江曰混同江水北行入色楞格河未
至句經大川三曰愛畢哈河曰土喇河曰鄂尔渾河黑龍江入
東海色楞格河徑俄羅斯入北海東以黑龍江爲主其目四又

其目曰受某部某某水北以色楞格河爲主其目三又其目曰
受某部某某水具如志以西塞小水附黃河流入中國者別爲
卷

蒙古臺卡志序

惟皇地祇爲主山川不能自辨自位是故古昔書有八索以政
其人民周之諸侯史氏率不能讀其名存者有戎索有周索以
侯以公以郡縣以城郭以行國皆將於是乎東於是乎西於是
乎南於是乎北我 國家君蒙古五十一旗喀爾喀四部地且
二百年一吏不妄行一馬不妄芻一兔一鹿不妄擢走是亦有
政撰臺卡志志郵志新郵志喀爾喀自備郵志鄂博志察哈爾
牧廠鄂博志卡倫志圍場卡倫志柳子邊郵 句 康熙三十一年
議自古北口至於烏朱穆泰置臺九又自獨石口至於蒿齊忒

置臺六又自張家口至於四子部落置臺五又自張家口至於

歸化城置臺六又自殺虎口至於吳刺忒置臺九又自歸化城

至於鄂爾多斯置臺八又自喜峯口至於札賴特置臺十有六

新郵句 乾隆三十四年議喜峯口路札賴特盡處起置郵十有

四古北口路烏朱穆秦盡處起置臺六殺虎口路烏喇忒大路

外置臺七張家口路自四子部落盡處起置臺十有大穆哈哩

喀遜爲起處哈拉尼敦爲住處喀爾喀自備郵句 東路首站曰

尼爾得尼拖羅海曰他爾袞柴木達後路首站曰肯特山西路

首站曰哈拉尼敦三音諾顏首站曰博羅布爾哈蘇凡冊汗冊

王冊妃冊格格賜賚賜祭天使至皆設之汗王貝勒公等自備

夫馬警晨夜伺畜牧過則徹焉鄂博句 以山爲鄂博以河爲鄂

博以壘爲鄂博二十五部落如其境察哈爾牧廠鄂博句 以山

爲鄂博以河爲鄂博以壘爲鄂博八旗如其境卡倫句以山爲

卡倫以河爲卡倫以樓望爲卡倫二十五部四喀爾喀如其境

圍場卡倫句規高以爲之卡倫句於陔於阪於嶺於山之隴

川之隴東句柳于厓口句西句柳于濟爾哈朗圖句北句柳于

塞堪達巴漢色欽又柳于阿魯色呼又柳于阿魯呼魯又柳于

英格又柳于拜牲圖乃西柳于庫爾陀羅海又柳于納喇蘇圖

和碩又柳于沙勒當又柳于錫喇札巴色欽絕南句柳于木壘

喀喇沁又柳于古都古爾又柳于察罕札巴又柳于汗特穆爾

又柳于納喇蘇圖乃西柳于噶海圖又柳于卓索又柳于什巴

爾臺又柳于麻巴圖又柳于博多克遂西柳于珠爾噶岱又柳

于蘇克蘇爾臺又柳于卜克又柳于燕子窩又柳于卓索溝絕

西句柳于察罕布爾臺又柳于阿爾散朗又柳于尼圖又柳

于齊呼拉臺又柳于布哈渾余又南柳于海拉蘇臺又柳于姜家營又柳于西燕子窩又柳于郭拜又柳于和羅博爾奇東柳于巴倫克得伊又柳于烏喇臺又柳于錫喇諾海又柳于納林又柳于格爾齊老柳在外卡倫在裏故地句周陸之中若爲翁牛特故地若爲喀喇沁故地敖漢故地奈曼故地土默特故地巴林故地喀爾喀左翼故地茲事嚴武旣麗旣博號令散見未有總述於古之世帝朔末或訖也王教未或經也由今之年文符武節所以旌也舜跡禹踵所以步也按籍受成里史之書與蒙古聲類表序

自國語以至額訥特珂克士伯特以至天山北路準部南路回部皆有方語則皆有字頭呼韻之學而五十一旗部屬及喀爾喀四大部反無之今蒙古語言文字具在沿流以溯原因子

而識母因其自然而不惟師心之尙能之乎曰不能則無爲貴
聽矣但其義迥觸手鉤棘道出於天籟無不同法成乎人例實
不一自國書十二篇外經典白晁同爲世尊之所宣說同是
阿難之所結集譯祖東游震且筆受一經之文先後數譯尙爾
乖迕若夫神珙所製司馬光所圖與德幹必特雅星哈所受通
密織布喇所傳乾隆初印承

睿指或煩定正而後臚列整齊源流明備各還其一家之言重
以準部有託忒體回部有彈舌聲下士謏愚冥搜博采求其貫
通不亦勞矣今先舉諸家各不同處然後準的可得而采義迥
可得而擇也諸家不同約有七事按僧伽婆羅譯師利問經舉
五十字不空譯文殊問經舉五十字竺曇摩羅察譯光讚般若
經舉四十一字無羅叉譯放光般若經舉四十二字鳩摩羅什

譯摩訶般若經舉四十二字元奘譯大般若經四十三字佛馱
跋陀羅譯華嚴四十二字實叉難陀譯華嚴四十二字地婆訶
羅譯華嚴四十二字三藏般若譯華嚴四十二字不空譯華嚴
四十二字金剛頂經五十字曇無讖譯大般涅槃經如來性品
六十二唱寶舉五十字六十二字約以十四音有重見之字故
止五十也有初短次短次長三種別佛
言皆以舌齒喉而有差別此經未
經同文韻統采摭故特詳之凡十三種皆一母一聲 欽
定天竺五十母西番三十母回部二十九母皆同惟

聖朝國書之母則以阿額衣鄂烏謬六字爲第一類餘至十二
字不等如八撥過以
下乃十二字準部十五母則亦以阿至互七字爲第一

類餘亦七字成類而非以額依等字爲所生之聲此例之異者

一也天竺母所生可舉者一千二百一十二字西番舊六字綴紗

姻妻爲合齊雅
合齊雅合凡六所生纔二十四字合新舊三十字所生可舉者

共四百三十四字回部所生字單字一百七十四字連字則以一字領二十八字輪流統領又兼本字自領本字如阿阿衣衣烏烏之屬計八百四十一字共計一千零十五字 國語則除

第一烏珠爲十一部之綱其第二部起自阿衣額衣阿拉額拉以下共生一千二百四十 字而準部十五母尙無推衍成圖

之作者

準部若以 國書比較只抵有 國書之第一圖耳

中華見溪羣疑卅六字舊法

有演出十二攝各四聲者又藏經十三種惟華嚴實義難陀木每卷畢唱演三節每節十字起至十四五字不等而仍收聲於第一字是亦譜生聲之例而彼十二家無聞此例之異者一也同爲母生子而所以能生又分兩種 國書仿照天竺之例定

有主輔二類其字之收聲於阿者定納阿至髻阿二十四字爲

輔字也阿至鄂六字主字也

第一部之納奴窩起皆收聲於阿皆輔阿而行

天竺自阿

至阿斯十六字主字也自嘎至嘎刹三十四字輔字也煌槃凡
六十二唱而佛言十四音亦具主輔之理餘如西番之三十母
卽不能分主輔矣而餘十二經準之託忒皆不能分矣且西番
舊六字無所配合而生聲實又難陀本無所配合而生聲卽回
部加記號之百七十四單字不能不以爲子而以爲二十九頭
之輔也蓋單字從字母生連字又從單字生比各家又中高一
重如算法家之有祖孫位是其特異然亦無所配合而生聲司
馬氏以十二攝演神珙近之矣但上爲雙聲下爲疊韻一言瞭
然不必謂之配合而生聲此例之異者三也南北等韻各家或
用喉舌唇齒分配陰陽而難有定論惟元人周氏作中原音韻
不用分配而陰陽乃確平不易人之喉舌唇齒皆各兼陰陽南
豈必分配乎周但以字區之
北人皆同之此例之異者四也恭稟 睿指 國書以阿字爲

元聲實挾古來聖神未發之秘胎八極於一喉自然之符也大藏十二種皆同天竺同準部同而間有小異者西番之不於發聲也同部之不於字頭而於化單字也涅槃之不於第一而於第四五六七也又複見第二十三字推本以譚西番自阿努之子通密繼布喇至天竺取三十四字歸剛其十一加舊傳紗等六字又加兩國同舊有之阿字爲卅字見徹辰薩囊書則原非以爲殿後字而章佳國師敘次之小倒也回部之單字一轉移而卽成愛里普固卽阿也涅槃之首三噫以義從非必以聲從也皆不出大聖人指授之範圍矣雖小異不闕大同惟大同可臚小異此例之異者五也中國等韻諸家舊法無文空圈記聲其二合之字獨見佛經瑜伽師地論中地字是也實又難陀於所生字每用圈於母字則始用二合室左是也三合者僅一見曷擲多是

也梁時僧祐作梵漢譯經同異記辨之博而見之早矣今準部

亦只二合無三合

欽定天竺西番皆至三合

謂所生字字母則以二合而止

無四合

國書回部書乃有四合回部竟至五合舌愈捷而法

愈遽矣此例之異者六也天竺西番有紗補住吉固徵卜納囉

雙納囉哈蘭答雅答克巴魯達札麻嚕烏巴達麻諸記號回部

則有則爾則白爾帕尺都則爾都則白爾都帕尺諸記號因思

大海烏巴什等

因蒙古書加圈點爲

國書亦卽此例蓋以

形命聲而不必本有其聲并不必別創其形至敏捷也餘家無

之此劉之異者七也今欲推見蒙古字母則諸家之法具在其

若之何而用所當用棄所當棄立於不可易之地哉按明初陶

氏曰元國字以可侯爲母此言巨繆者也則恭援小兒初生之

聖訓以斥之至其都數則定以十部每部之數則以三爲例凡

三十聲爲第一總圖兼用百五音隸十五類之例天山北路與喀爾喀接壤同祖故也不以第一頭爲九頭之綱不必於巴博卜下收聲於阿不必配有主輔而生聲此則不泥於例也三十字中有兩字書成一作一聲讀者凡五其二十五皆單聲也所生之圖首分陰陽兩大支爲兩圖何爲陽以中國有平聲無上聲之字爲陽何謂陰以中國四聲具足之字爲陰此元人周德清例也陽凡十七母陰凡十三母也陰陽各舉字七倍於母餘可以推也又使卅頭以一領二十九互相領而疊書之上書大下書小成一圖得九百聲回部連字例也又於三十頭之下各加一瑣都記號各成一聲又於三十頭之下各加一天竺雅答克記號改成一聲又於三十頭之下各加一吉固記號改成一聲共又得九十聲回部單字例也第五第六第七圖猶 國書

總圖外之十一圖也其書連字樣則亦 國語及天竺例也有

二合三合四合無五合參用 國語天竺西番例而不用回部

例也每頭之下必註明今蒙古語之某句某字以見圖為蒙古

作也蓋為圖凡七為聲凡一千四百有十第一母阿字阿實達

第二和字和拉哈第三伊字伊蘇為一類第四母巴字巴拜岱

第五母博字卓齊博第六卜字實喇卜為一類第七母圖字蘇約

圖之第八騰字騰吉思第九坦字哈坦為一類第十哲字哲

第十一札字札木楚第十二春字庫春為一類第十三蘇字

舒蘇第十四蘇圖第十五索圖和即阿之轉索圖即蘇圖為一

類第十六喇字喇呼齊第十七拉厄字即喇第十八朗字達朗

朗為一類第十九穆字圖薩特第二十曼字曼濟爾第二十一

穆爾字穆之為穆爾猶蘇索之加為一類第二十二母諾爾字

圖此如琴家之有泐聲

諸穆親

第二十三囊字

他布囊之囊

第二十四奠字

奠曼爲一類第

二十五丹字

羅丹第二十六等字

鄂等答

第二十七特字

士默

特爲一類第二十八棍字

棍楚克

第二十九肯字

色微肯第三

十克字

克呼爲一類

上鎮守吐魯番領隊大臣寶公書

不譽顏色已八年自珍至京師之前一月始聞西命吾師禁近大官出萬里之積統甲一旅同朝者惜公門下士爭慰公自珍謂內廷少吾師一人

天子未闕於侍從漢大臣得罪者或削職歸田里吾師猶冠三品冠以大臣印行且翰林多不更於政部閣又不足以老公之才吾師感激報効穢在今日故於庚午同年之公郵而西也附區區所欲言者以誅於隊下之吏吐魯番故無領隊將也自闕

展移駐後遂與四大城踔尾而五自素賚璠襲爵後南路無事
遂五十年矣南路之民與準部異性情懦直一異面貌平正似
內地兩異其文字聲音易通曉三異故天心之待之亦大與準
夷異我

高宗皇帝豈樂於窮武以炫史乘哉我

國家坐食數千城何貪於準夷哉實以準夷迫逐回人北徙而
南天愍回人之无辜故開

高宗皇帝起之鄙邑隸之天廷出之幽谷暴之白日準夷又積
狡爲叛其性惡自祖先而然氣感於天而怒觸於

帝

高宗一天也是故準噶爾故壤若庫爾喀喇烏蘇若塔爾巴噶
台若巴爾庫勒若烏魯木齊若伊犁東路西路無一廬一帳是

阿魯台故種者觀天之不慈不佑於準部卽知其不絕佑於回部巨物不兩立亦不兩仆回部多古民叢叢蝨蝨漢世三十六城之孽裔尙有存者天存之

高宗存之也

高宗一天也自波羅泥都霍集占助逆背德

高宗始用兵于回烏什之叛乃再用兵于回然而兩和卓木之罪視準夷之達瓦齊阿睦爾薩納爲綱烏什之酋長罪視兩和卓木爲又綱微大和卓木之殺阿敏道一事地雖大

高宗不欲取民雖富

高宗不欲臣泊乎臣之取之回國亡而種姓不亡或一姓亡而羣姓不亡阿渾伯克得翎頂以從滿州世臣之後甚至如烏什之滅

聖天子且未嘗如搜捕準夷例故曰

高宗一天也今之守回城者何如曰天天而已矣天

高宗而已矣鄰國者國之鑑也吾師亦知烏什往事乎素誠者
旗下役也叨竊重寄爲領隊大臣占回之婦女無算笞殺其男
亦無算奪男女之金銀衣服亦無算烏什殺素誠以叛烏什之
叛

高宗且撻伐且憐哀

聖諭以用素誠自引咎

御製詩時以激變爲言謂素誠死有餘罪納世逼卡塔海之諫
也非以失機也以平日擾回也明將軍阿將軍之出也非爲素
誠報仇也以警羣回也至聖至明未嘗稍有偏護及好殺之意
嗣後各城相顧自疑自怖數十年來上賴

朝廷德厚下賴賢將軍賢大臣等明示胸肝告以

天朝雖驪回地斷無喜殺回人意大臣皆奉公法屯說戶演賴以无事今之守回城者何如曰令回人安益安信益信而已矣信生信不信生不信不以駝羊視回男不以禽雀待回女回人皆內地人也皆世僕也回人老於禍福最老久祭天而祈拜佛而誓寫甍而記之刻刀而銘之以烏什爲恐吐魯番爲南路建首地一王巋然有僕三千戶皆以吐魯番爲望恐之言曰莫更爲烏什矣望之言曰安得如吐魯番矣故吐魯番安而四大城皆安四大城安而天山南路舉安天山南路安而非回之天山北路安天山北路安而安西南路北路舉安伊犁將軍無內顧之憂蘭州總督無外顧之憂如此則回部之紅銅常貢於法局回部之大頭羊常充於天廚吾師乃不媿爲

高宗皇帝之臣僕夫

高宗皇帝之臣僕回長之所敬也回民之所愛也郭勒之神達
巴之靈亦必福吾師矣且吾師亦知準噶爾部之所由屠滅無
遺種乎珍又有說始噶爾丹人居塔爾喀賽因諾顏部超勇親
王未稱不過北陲一嗜肉之獸不但東南不近札薩克東不近
牧廠而且以西論并不有後來準部全地亡何漸念貪漸忿忿
入寇赤臣士謝爾汗兩汗亦有邊竟細夫不勝而入控

聖祖我

聖祖乃奮天威三起而三逐之每一次之入必深於前次

聖祖之初懲之亦嚴於前次卒至噶爾丹棄地西走而死謂可
以集矣不幸而其兄子能收舊人又不幸而其族收其西竟地
又不幸而輾轉強大不北噬而西嚙也逐回部擾青海直西藏

隣俄羅斯我

朝一祖二宗三世西顧龍顏焦勞幸而其國篡弒相繼幸而三策凌來歸幸而阿睦爾薩納來歸謂可以集矣詎知幸者皆不幸之伏不幸者又幸之伏幸不幸凡幾相進激而遂致我

高宗皇帝之大怒

帝怒於上將師怒於下自天而下自地而上大蹙大勝千里一赤睢盱之鬼浴血之魂萬億成羣秦岱不錄天帝不直何爲而至是哉彼回部者亦有經卷亦談因果試召阿渾而問之因何其細果何其大抑造因之時能豫知果之至如是哉是故今日守回之大臣惟當敬謹率屬以導回王回民刻刻念念知忠知孝愛惜翎頂愛惜衣食味誦經典耕者毋出屯以墾牧者毋越圍而刈上毋虐下下毋藐上防亂於極微積福於无形則可謂

仰體上天好生之德乃亦毋負

高宗用兵之意者哉若夫議遷議設撤屯編戶盡地力以劑中國之民自珍另有西域置行省議一卷用厚白紙寫上塵覽珍受恩最深受恩最早故敢越分而多言惶悚

上國史館總裁提調總纂書

內閣中書本館校對官龔自珍上書各中堂各大人各先生閣下本館現在續修大清一統志自乾隆三十九年書成後伏遇今日重修欣賀无量續者纂其所未載修者訂其所已成自珍與校對之役職校讐耳書之詳略得失非所聞亦非所職雖然竊觀古今之列言者矣有士言於大夫後進言於先進之言有僚屬言於長官之言僚屬言於長官則自珍職校讐而陳續修事宜言之爲僭爲召毀士言於大夫也後進言於先進也則雖

其言之舛先進固猶辱誨之自珍於西北兩塞外部落世系風俗形勢原流合分會少役心力不敢自秘願以供纂修協修之采納而仍不敢臆決其是否恃中堂以下之必辱誨之也不得以官牘請爲書一通如干條如後方

一 欽定西域圖志及 皇朝文獻通考四裔考皆於西邊新疆外臚屬國一卷西邊有布魯特哈薩克愛烏罕納木干安集延痕都斯坦諸類舊志約畧開載竊謂西有西屬國北有北屬國北屬國之情形與西國尤不同北屬往往錯處喀爾喀伊犁之間東北則錯蒙古黑龍江之間 天朝亦往往用其兵力如烏梁海則

聖祖平漠北用之

高宗平準噶爾用之巴爾虎則

聖祖平羅剎用之科布多七旗則以買市至無虛月皆見忠悃
非安集延等孤懸慈嶺者可比是故 欽定蒙古王公表傳則
嘗取科布多之扎哈沁一旗攷其世系書其功績以壯盟府之
臧而烏梁海一國三支分處自討噶爾丹招降後和羅爾邁遺
使貢貂至今年班不絕在唐努山者則有和羅爾邁見檔冊在
阿勒坦淖爾者則有特勒伯克札爾納克皆見檔冊於功不爲
黜矣於恩不爲綱矣舊一統志於新舊備服外一字不及之疑
於無此屬部者然今開館續修志似宜行文理藩院徵檔冊將
三處烏梁海頭目宰桑各部落畛送館以便增補

一本館現存貯

聖祖聖訓及平定羅剎方畧一書方畧爲 文淵閣未著錄之
書內各有巴彥虎事蹟數條各官書於巴彥虎皆不及之但稱

巴彥虎現有借牧呼倫貝爾一事按巴爾虎舊牧當在尼布楚
雅克薩城之間與內藩之烏珠穆秦地勢正相直宜撥理藩院
行文黑龍江將軍將其頭目遷徙年月部落界移送到館木館
以

聖訓方畧核對之即可纂補

一札哈沁族類雖細已蒙 欽定表傳臚八宜將禡木特一旗
現在牧科布多之何所補八北屬國如補烏梁海巴爾虎之例
一北之有科布多猶西之有青海也青海爲部五而科布多爲
部七考現在檔案其不與商民通市者一部曰土爾扈特曰和
碩特其與商民交易者五部曰札爾伯特曰額魯特曰明阿特
曰札哈沁曰烏梁海此七者惟札哈沁得上見於表傳六部無
聞表傳原爲紀功績而作無功者不書一統志地書也焉得而

削之考科布多地界在喀爾喀之西北伊犁東路之東南宜行文叅贊大臣將札哈沁及六旗土界旗分一一移覆本館開載又此處烏梁海之與唐努山二烏梁海同異合分之故遷徙之年月可一并移覆藉畧見焉

按此在科布多與哈薩克接壤之處距唐努山三支太遠故疑非同類

一北厄魯特者本準噶爾綽羅斯同族阿逆未叛時首先來歸詔隸三音諾顏部據理藩院檔冊稱現在附盟於齊齊爾里克地方見旗二爵二貝子二人一僱厄魯特旗一僱厄魯特前旗者是與 皇朝文獻通攷合舊會典稱一旗先駐達拉爾河一旗先駐喀爾喀河文獻通考襲是語按

欽定王公傳傳阿喇布坦一族先牧喀爾喀河後牧推河後乃徙牧烏蘭烏蘇丹濟蘭一族先牧喀爾喀河後牧西舍穆稜後

又牧推河後乃徙牧烏蘭烏蘇年月皆在始皆當偁推河厄魯特也繼皆當稱烏蘭烏蘇厄魯特也何有曾牧達拉爾河之文舊典一歧矣於烏蘭烏蘇外別出推河厄魯特之號似乎以阿喇布坦族爲烏蘭烏蘇以丹濟蘭爲推河者然兩歧矣細繹王公傳推河始立六旗一旗是輝特一旗是賀蘭山之分支與此無涉此共四旗茂海一旗叛亡亦弗數阿喇布坦之兩旗後并兩札薩克爲一兄終弟及兄無嗣故其一旗則丹濟蘭子也舊會典係乾隆二十六年所修此并旗年月亦難臆斷大約與典不甚相先後典乃偁烏蘭烏蘇爲兩旗而不連所謂推河者數若曰從其朔則朔當是五旗何但二乎三歧矣舊典外余所藏戊戌內版摺紳書與典同又王公傳王公表皆偁丹濟蘭先封貝子其子先封公後封貝子並無先封台吉語舊典及戊戌內

板摺紳皆於烏蘭烏蘇則注曰兩旗貝子二人於推河則注曰
一旗台吉一人四歧矣官書處處不合再四攷訂惟有敬遵

欽定王公表傳爲的餘書盤戾糾紛而舊一統志遂一字弗及
之無可考

一所貴乎重修者謂將糾舊誤補舊闕亮非抄襲沿承而已舊
一統志於兩州牧地既不道及矣而於西套賀蘭山厄魯特之
下忽注云一旗係阿喇布坦裔一旗係丹濟拉裔賀蘭山在青
海之東烏蘭烏蘇在沙磧之北相去將六千里一係綽羅斯族
一係和碩特族今置和羅理名氏於不問以北人之祖先移贈
於西亦豈舛之細者矣糾而正之諸公豈有意乎

一舊志於青海下畚書云青海爲四衛拉特之一於西套下又
注云四衛拉特中北厄魯特居其一攷四衛拉特皆在天山北

路準噶爾地一綽羅斯二杜爾伯特三和碩特四土爾扈特後
土余扈特逃往俄羅斯乃補八輝特見於

高宗皇帝御製文及種種官書種種檔冊無弗合青海是地名
非部落名非種族名其地則和碩特族居之後輝特有居者後
土爾扈特種有居者後綽羅斯種有居者後北方之喀爾喀種
有居者又番僧察罕諾們漢之屬僧亦編旗而處之將合此六
者而指爲四之一乎北厄魯特乃綽羅斯之一支以北爲四之
一將置其全部於何稱今之脩官書者闕至此其謂之何

一西套厄魯特兩支一和碩特一土爾扈特皆與青海近戍戍
內板摺紳臚序青海之後不誤舊會典乃於兩支中夾敘一烏
蘭烏蘇失之矣舊一統志僅開載賀蘭山之厄魯特而不載額
濟內河之士爾扈特應補

一地名半以種族而得各人皆知之至地有以人徙者無城郭之民類然如明時兀良哈三衛福餘衛是嫡酋所居出口卽是泰甯衛出關卽是始則地因人得名繼且挾地名而徙今之烏梁海遂爲皇朝極北竟矣和碩特有借牧科布多者嘗見科布多大臣章奏遂稱其一區爲和碩特矣札哈沁本西域汎卒之稱自安放科布多後北方遂增一部落稱呼矣舊地名新地名類此者極多攷沿革者宜畧知此

一修書宜畧知鈎稽法如四衛拉特三有姓獨土爾扈特無姓由後言之雖謂土爾扈特卽是姓可也謂和碩特卽姓和碩特無不可也由前言之固皆以地名爲姓敢據徹辰薩囊書稱其出恭博地方定土爾扈特爲恭博姓

一衛拉特是五族公共之稱各種官書獨於綽羅斯一族則單

稱厄魯特不知始於何例然如西套賀蘭山及青海之厄魯特
甘有一旗者細考實非綽羅斯乃和碩特也與它處又不盡一
今宜定一例連姓稱綽羅斯厄魯特而西套青海皆改書和碩
特

一青海四部爲旗二十有九此外實尙有綽羅斯遺民一類於
乾隆二十九年移徙而無編旗明文歷來只數四大部而遺
其一舊志因仍宜一面行文貴德循化辦事大臣查覆一面恭
檢

欽定平定準噶爾方略續編開載

一各處里差經緯度數舊典頗多舛如阿霸垓阿霸哈納爾皆
左翼有之右翼無之左右翼里差斷乎弗同又如科爾沁六旗
只詳一旗鄂爾多斯七旗只詳一旗宜行咨欽天監攷補

一引書用舊說宜加拊比各具體裁官書中如三通大抵沿舊文少所發摛如撰七音畧取之

欽定同文韻統撰六書畧取之

欽定西域同文志夫西域同文志專爲譯西而作故於國書下先注明西域書乃次各種書而所臚僅西域地各人名山川各若以皇朝全代全輿論西域亦一隅之一隅自宜分類搏徵備詳訓詁以清文鑑爲主以滿漢官各地各舉例不得以西域山川舉例是撰皇朝六書畧而獨以西域爲主矣三通爲本館朝夕編摩取材之書故特發其凡以勸愼重

一舊志驛站下云自獨石口至蒿齊忒九百餘里爲一路置驛九考理藩院檔冊稱實六百里置郵六又志於古北口喜峯口外載乾隆三十六年之新郵而張家口外亦有新郵自穆哈哩

喀遜爲新站起處哈拉尼散爲住處凡十六站何以失載又喀爾喀汗自備之郵站亦宜畧志一二俾往來天使知厥隘畧

一回部風俗亦佛教之支流其人祖曰阿且其教祖曰默赫爾默特其師曰阿渾其同種曰穆哩斯瑪奈其學問曰二令戒邪淫戒殺戒妄語戒酒戒盜其字頭始愛里普其厥元亦不拘至黷同日分杪無餘之法而自成章部不置閏大約爲西洋新法歷書之所祖或云頗近授時歷也其教實與西洋耶穌教大異唐時流行中國之景教水經注之祆祠自是耶穌教非默赫爾默特教皆佛典所稱九十六種旁門之一要之比於準部之黃教食肉衣黃之制不猶未遠佛意哉自珍另有內典旁師攷一篇呈覽竊按在西洋則爲耶穌教在蒙古準部則爲宗喀巴教在回部則爲默赫爾默特二令教風俗一門宜區以詳焉以彰

兼收並畜之蹟且盛

一西域屬國如布魯特之在南部哈薩克之在北部向於

天朝恭謹各官書只記大概今中書徐松在西域時會鈎稽兩部世系地界沿革成兩表當代奇作此可以沿用者

一西藏亦有屬國猶喀爾喀之附見巴爾虎烏梁海科布多回部之附見布魯特安集延痕都斯坦準部附見哈薩克之例曰廓爾喀實最大其次曰作木朗曰布魯克巴曰哲孟雄曰落敏湯皆宜附見廓爾喀本名巴勒布國初巴勒布三罕曰葉楞罕曰布顏罕曰庫庫木罕於雍正九年各奏金葉文遞哈達譯出詞旨甚恭順 命以坡黎磁器賞之後三罕合爲一故巴勒布益强大戊申辛亥兩用兵亦

皇朝巨事實也風俗形勢宜備載

以上都一十八條皆舉其炳炳顯顯者餘小事頭緒尙多未易
盡宣懼循襲而不改闕略而不補顛舛而不問苟簡而不具弃
置而不道回護而不變有重修之費有重修之名將使後之專
門者靡所鏡也中華文獻夥有通人無甲第名位弗敢妄議惟
此類語言文字求之親到其地者尙或懵昧答不中間可知從
事鉛槧之難珍雖非絕詣自是孤學尙蒙垂擇致爲榮幸而於
已非有利焉不勝悚惶待教之至

與人箋

謹檢各件敬檢上青海本番地也番子是吐谷渾之裔唐以前
實強後少弱亦不失爲大國一見逐於正德間之蒙古阿尔禿
斯再見逐於國初衛拉特固寶汗三見逐於三傳之羅卜藏
丹津羅卜藏丹津者叛

世宗朝以覆固實祀故今之青海和碩特則並非固實嫡種矣
今和碩特二十有一旗是不從羅卜藏丹津叛者其餘喀爾喀
一旗輝特二旗土爾扈特四旗皆以雍正未乾隆初陸續徙往
以地未實故與和碩特分居番子故地天道好還強弱迭代今
番子之事必聲言報先世之仇名近正力近強必非各旗所能
禦淠中諸旗距番遠尙可自活河北之帳必危自然之勢也聖
者貴因天運之自然矧番子未嘗獲罪 天朝古未有外夷自
相爭掠而中朝代爲之用兵者且蒙古亦何可令之強強卽弗
恭順傳曰狝糠及米羅卜藏丹津之前事可爲之續邪番人蒙
古皆信佛大喇嘛察罕諾門汗一旗最富盛貧番子往往賴其
牛羊以活喇嘛位號在西藏達賴之下并在漠北哲卜尊丹巴
之下僅與後藏班禪比若朝廷許進其位號許造廟宇必肯出

力以佛法兩勸而兩罷之不調一兵不費一粟以外夷和外夷
智之魁也今兵力物力皆非開邊釁之會克則殺機動不克則
何以收事之局於事前思之惟大喇嘛雖富而弗傳子雖有功
而無後患無事則無患有事則可用此

列聖尊崇黃教微指也走雖明習何敢妄論邊事承咨采再四
故條出大槩以附直而勿有之義其地形道里各件程府丞昔
歲開糾方而得之者想明核走處僅一分覽畢當見還也不憚
壬午十一月八日

定盦文集

仁和龔自珍瑤人館

卷下

五經大義終始論

昔者仲尼有言吾道一以貫之又曰文不在茲乎文學言游之徒其語門人曰有始有卒者其惟聖人乎誠知聖人之文貴乎知始與卒之間也聖人之道本天人之際臚幽明之序始乎飲食中乎制作終乎聞性與天道民事終天事始鬼神假福禔庶聖蹟備若庖犧堯舜禹稷契臯陶公劉箕子文王周公是也謹求之書曰天聰明自我民聰明言民之耳目本乎天也民之耳目不能皆肖天肖者聰明之大者也帝者之始也聰明孰爲大能始飲食民者也其在序卦之文曰物穉不可不養也屯蒙而受以需飲食之道也其在雅詩歌神靈之德曰民之質矣日用

飲食是故飲食繼天地又求諸禮曰夫禮之初始諸飲食禮者祭禮也民飲食則生其情矣情則生其文矣情始積隆隆然始盈也莫莫然求之空虛望望然始相與謀曰使我有飲食者父歟母歟父母非能生之也始其天歟乃率其醜取其功以報於天蓋仰而欲天之降之也再相與謀曰父與母與曷爲不與我共飲食與則弗之見矣乃號其醜取其功以報於淵泉蓋俛而欲父母之假之也三相與謀曰非天也非父母也孰使我以能飲食與則弗之見矣於是號其醜取其功以報聖之人蓋每食四望而欲其降之也若其教之降首屈股下上手與其下上手之數以差由中古作故曰覲百禮之聚觀人情之始也故祭繼飲食夫禮據亂而作故有據亂之祭有治升平之祭有太平之祭聖人曰我主天而衆之祭始息聖人曰我不敢僭天而衆之

祭不敢先一人聖人自爲謀曰孰使予大川盈大陸平大物膾成而小物毛烹於是乎食人鬼之始播種以配上天食人鬼之始平道塗以配於下地食人鬼之聰明仁聖者於宮後王曰社稷賢宗以恩父爲綱矣故恩及王父王父以上統曰祖其所居曰廟其在禮曰祝以孝告嘏以慈告此禮之大成也此言有異乎土鼓之祭其實升平也其在公劉之四章曰踴踴濟濟俾筵俾几既登乃依乃造其曹執豕於牢酌之用匏是時饌糧完具始立國而祭也又曰君之宗之惟祭乃立宗非祭則宗不顯明是故公劉教民祭而豳國之民無不尊其宗者後其支者大宗無不收羣宗者謹求之春秋必稱元年季者禾也無禾則不年一年之事視乎禾洪範稱祀者何禾孰而當祀祀四時而徧則一年矣元年者從食以爲紀元祀者從祭以爲紀其在周公報

成王曰祀於新邑咸秩無文周所以始立國也微子數商王辛之罪曰今殷民乃攘竊神祇之犧牲牲用以容將食無災上世方亂猶祀矧商階升平之資乎言辛所以災也度名山川升崇岡察百泉度明以爲向度幽以爲蔽博土而爲陶鑿山而爲礫以立城郭倉廩宮室高者名曰堂下者名曰室以衛鬼神屏男女伐山之木以爲之羣材其百器以寓句股以求九數其在於詩旣景乃岡以測知北極之高下又曰夾其皇澗遡其過澗以順水性則司寇之始也此其與百姓慮安者也若其與百姓慮不安者所以安安也曰飲食之多寡祭之數少不後長支不後宗筋力者暴贏於是乎折槿析木而榿之則司寇之始也而聲問乎東西而聲問乎北南飲食之多寡祭之數少後長支後宗歟筋力者毋暴贏歟皆必赴司寇而理焉理之而無不威故

口鞭蠻夷撻六合也謹求之書皇陶爲士其職也後王謂之兵
兵也者刑之細也士也者理也有虞氏之兵也其在洪範八政
有司寇後王有司馬司馬司寇之細也聖者曰吾視聽天地過
高山大川朝天下之衆管其耳目心思辨佞之雄長而戶徵其
辭使我不得獨爲神聖必自此語言始矣爰是命士也命師也
命儒也聖者至高嚴曷爲習揖攘之容虛賓師之館北面清酒
推天之福祿與借使吾世世雄子孫必變化恭敬溫文以大寵
之豈懼其武勇之足以斂吾祭哉誠欲以一天下之語言也儒
者出而語民曰非特珪璧也其積者齋粟也而人莫不歡心以
助吾祭矣不然邊鄙之祭夫豈無私玉儒者又出而語民曰非
恃干戈也其積者和也而人莫不出私力以杆其圉不然南畝
之勇夫夫豈無私兵謹求之禮古者明天子之在位也必徧知

天下良士之數既知其數又知其名既知其名又知其所在蓋士之任師儒者令聞之樞也令聞饗帝之具也其在記曰三代之王也必先其令聞夫名士去國而王名微王名微而王道薄故曰殺胎破卵則鳳皇不翔捨麋取犢則麒麟不至其在記曰土敝則草木不長水煩則魚鼈不大良士國之金玉異物也草木厭之而况金玉乎魚鼈槁之而况蛟龍乎誠苦之也名士之有文章望國氣者見其爛然而光於天求之雅詩曰倬彼雲漢爲章於天周王壽考遐不作人其推天人之際曰相彼鳥矣猶求友聲矧伊人矣不求友生神之聽之終和且平是野有相慕用之朋友而可薦於神明也其衰也賢人散於外而公侯貴人之家猶爭賓客於酒食其大衰也豪杰出陰聘天下之名士而王運去矣謹又求之洪範八政七曰賓八曰師賓師得而彝倫

敘也何以曰敘也古之賓師必有山川之容有其容矣又有其
潤有其潤矣又有其材王者之與賓師處聞牛馬之音猶聽金
玉也親塵土之臭猶茹椒蘭也其在記曰君子曰德德成而教
尊教尊而官正官正而國治矣其在詩曰有馮有翼有孝有德
夫食貨具則有馮矣官師備則有翼矣祭祀受福則有孝矣賓
師親則有德矣誠約彝倫之極完神人之慶也聖者曰吾非多
制以好勞也多文以爲辯也無政之曰闕政不中之曰不敘闕
且不敘中國必有不安者矣夫如是是枕嵩華而身衽曠土之
原也觀其制作曰成矣求之春秋則是存三統內夷狄譏二名
之世與三統已存四夷已進譏僅二名大瑞將致則和樂可興
而太平之祭作也是故有禘推五行得感生之天主天帝而以
人鬼配之有宗祀祠天帝於宮而以父配之練而齋齋而盟盟

而祭其在易觀盥而不薦有孚容若禘之盛也其在詩璫彼玉
瓊黃流在中宗祀之盛也文祖明堂以燔之名郊宗石室以建
之主兼禮備樂以存之統升珪瘞璧以崇之女九州四海以象
之宮重植祀也有封祀求之詩於皇時周陟其高山隴山喬嶽
其在禮升中於天而鳳皇降龜龍假封禪之盛也合此三者
春秋說曰以美陽芬香告於天猶告盛也有宮中祠昔在黃帝
集萬靈於明庭萬靈者配太一者也在天官曰太一在禮亦曰
太一在易曰太極昔在成王襲祖考之勤勞有周公以代制作
法宜得爲太平世謹求之書有曰子沖子夙夜毖祀毖祀宮中
祠之盛也其在後王服玉而延年宵中而禮焉几而候神則動
過其物也然亦固有咎於天使天下之老者自視如壯者使天
下之壯者自視如幼者雖有積瘁之士沉思之民春如三春秋

如三秋晝如九夏夕如九冬故國暇而能修民暇而性命治
聖人之以能有名號者有四象焉曰暇曰順曰雍曰嘉其在詩
將欲以美公劉之功而總其意曰旣順乃宣而無永歎其在禮
曰明於順然後能守危也又曰達於順又曰順之實禮之終猶
詩之始也求之書曰高宗三年不言言乃雍其在詩曰有來雍
雍言雍在下也雍雍在宮言雍在上也灑掃嘉宮庭之道也朝
日嘉且晝之道也夕月嘉莫夜之道也五色而絲聲嘉后妃之
道也無夢也有夢則太人以占嘉寢寐之道也其在禮曰以嘉
魂魄是爲合莫方祭而有嘉也謹求之詩曰予懷明德不大聲
以色不長夏以革遂終言之曰不識不知順帝之則謹又求之
禮曰聖人耐以天下爲一家中國爲一人必知其情何謂人情
喜怒哀懼愛惡欲聖人治人情必反攻其情以已治之聖者有

情與曰微矣至清以有神至和以有精至靜以有形至澹以應
羣靈至沖虛以應兆人故遂終言之曰心無爲也以守至正無
爲本太一而已矣天下雖有積瘁之士沉思之民其心疾可得
而已也上帝萬靈可得而晝夜通也是故有善可得而薦也有
命可得而受也有作可得而合也然則絕地天通非歟胡爲其
非也聲以色猶不欲而釋神人其爲聲色也大矣先王惡其驚
民也非太一之謂也夫知之何而可以極言聖人也曰盍游乎
澗然不瞬之中置乎肅然清靜之上端端乎遇聖人焉謹求之
易曰聖人以此洗心退藏於密吉凶與民同患神以知來知以
藏住其孰能與於此哉古之聰明容知神武而不殺者夫極之
矣極之矣夫如是則謂之能天天也者福之所自出也書有五
福焉詩稱百福焉稱萬福焉皆能天之義也

宋先生述

君姓宋氏諱璠字魯珍浙汪嚴州府建德縣人曾祖載祖紀勳
又圻安選拔貢生自祖以上仕否及妣氏族俱未詳弗可述君
幼以孝聞力於學其治經也總羣書並進天旦而起漏四下而
寢不接賓客瘁志纂述大書如棋子小書如蚊腳墨書或濃或
澹朱書如桃華日罄五七十紙如是者不計年當可得百餘萬
言局一敝箱中不知果成書與否又不知欲成何等書身後無
可問者嘉慶七年以選拔貢生來京師主刑部員外郎戴公家
以戴公薦來主吾家訓自珍以敬順父母舉嘉慶九年順天鄉
試十五年歲庚午卒年二十三無子浙中傳君晚年信疑龍家
書遷家兆手一卷書督畚鍤有白告起地中觸君身而死其誣
與其有之與吾家自賓客羣從逮老僕婢至今皆稱之曰宋先

生嘉慶丙子春武英殿校錄副榜貢生弟子龔自珍謹述

擬上今方言表

臣自珍言臣在京師造今方言書徂江之南歲而成首滿洲
尊王也臚十八行省大一統也終流求高麗蒙古喀爾喀示王
者無外也民之所異於禽獸也則聲而已矣人性智愚出於天
聲清濁侈弇鴻綱出於地每省各述總論述山川氣也氣之轉
無際際厚氣者有際寸合而尺徙尺合而咫徙故府州縣以漸
而變不敢紊也董之以事部之以物俾可易放也天道十年而
小變百年而大變人亦小天古今朝市城邑禮俗之變以有形
變者也聲之變以無形變者也擇擇傳記博及小說凡古言之
存者疑於下方知今之不自今始也及今成書以今爲臬也音
有自南而北東西者有自北而南而東西者孫曾播遷混混以

成苟有端緒可以尋究雖謝神警不敢不聽也旁采字母翻切之旨欲撮舉一言可以一行省音貫十八省音可以納十八省音於一省也臣又言曰三皇之世未有文字但有人聲五帝三王之世以人聲爲文字故傳曰聲之精者爲言言之精者爲文聲與言文字之祖也文字有形有義聲爲其魂形與義爲體魄魄魂具而文字始具矣夫乃外史達之太史登之學僮諷之皆後興者也是故造作禮樂經略宇宙天地以是靈日月以是明江河以是清百王以是興百聖以是有名審聲音之教也

知歸子讚

懷歸子曰震且之學於佛者未有全於我知歸子者也佛之徒吾能言之大都風生所造糾纏至煩重其生也必抱民生絕幽苦之一境所苦不同要皆今古无比例語言文字所窮以爲其

根本於以束其靈異智慧之心而不得試於外則尙不知有佛也乃遁而之于齟怳曲屈淒異幽靈孤譎之一境語言文字所窮以爲其徑竇久而自知其不得以試於世乃姑蓄之而作與世謀於是食萬斤之牛建摩天之旂以號於天下曰吾當卽世謀自羲炎以來文字无不受也日星河海之行帝王妃后臣宰農工徒隸之法无不籀也當世人民鳥獸龍魚蝨蟲之情狀无不隨也身命色力畢耗於是久而自思其何所返且求諸外且索諸內皆不厭吾意於斯時也倅焉而與其向者靈異智慧之心遇遇而不逝乃決定其心蓋三累三折之勢知有佛矣之人也設震且之人從而尸視之則徒能見其中央而已矣其學於佛也又以其十之四習密部以祈其災而澹其憂其爲第一大事謀十之六耳惟知歸子不然初亦不然中亦不然終乃

愈全豈非大菩薩度世示現者哉合十翹誠而製讚曰有美一人不可測色究竟天三昧出示來震且往淨域眷屬如意名聞昌衆生大福一身當之人尚然思故鄉汝何人斯戀一方重曰有美一人兮青蓮之華美人思我兮無以爲家嗚呼我如肯思兮亦既有家

定盦七銘

襦所居以輔名字古未之有也雖然古文變而篆大篆變而小篆小篆變而隸則若是已矣余猶爲之且系以七銘

枕之銘曰以蛇而去蛇安眠者如是邪

鐙之銘曰如擎油滿中不動無所棄

研之銘曰十二煩惱汝志之煩惱俾汝志也

眼鏡之銘曰潰者利逼心光之則

定齋文集 卷一
孟之銘曰惜於水淳於孟不淳汝智孰惜汝智之枯

坐之銘曰天九萬淵九萬尼汝於一輪

一切處之銘曰不送汝矧逆汝煩惱身亦委蛇而畢汝

與江居士箋

別離以來各自苦心榜其居曰積思之明顏其寢曰寡懽之府
銘其凭曰多憤之木所可喜者中夜皎然於本來此心知無損
已爾自珍之學自見足下而堅進人小貧窮周以財帛亦感檀
施况足下教我求無上法寶平人小疾痛醫以方藥亦感恩力
况足下教我求無上醫王平人小迷跌引以道路亦感指示况
足下教我求萬劫息壤乎別離已深違足下督策掉舉轉多昏
沈不勉至於手教慮信根退想戲弄之言自珍久不見有信根
信是何根根何云信本來如是而已何况有退失邪重到京師

又三年還山之志非不溫熒寤寐間然不願汨沒此中政未易
有山便去去而復出則爲天下笑矣願叟語言簡文字省中年
之心力外境迭至如風吹水萬態皆有皆成衫彰水何容拒之
哉萬一竟可還還且不出是亦時節因緣至爾至於與人共爲
道風所願也寔負至今雖遇聰明貴人祇宜用一切世法而隨
順之陳俄夫之晨呻於九賓鼎食之席則叱矣愬寡女之夜哭
於房中琴好之家則諍矣况陳且愬者之本有難言也平行願
品久收到圓覺疑聞蘇州刻成前約所云不忘也常自致貝居
士伏惟吉祥不宣癸未六月二日自珍和南

戒將歸文

予幼遘厥心疾兮背吉祥而誓馳下上無所泊於天淵兮結靈
光而內回民奠予于衆所食兮予竊眇以吟呻殺類草於旁秋

今吟華於上春予幽幽以自媿兮非衆磨之能穴耻列炬之平
然兮非孤光之所逼塞萬歧之恆由兮乃淪然而怒出精炯炯
其獨寤兮物溫溫其燭楹拂清輝而不御兮嫌太陰之尙墮乎
形忽皇皇其悲無依兮客迭索而無贈媿衆心以爲才兮亦聊
棲而強定久浮浮而變化兮羌卽事而成逕八屏處而自探兮
乃大哀而亡命嗟微塵之不九竅兮驅匠灑而宅之造亭亭之
高宮兮接王女於雲涯蘇予息之奄奄兮未成象而目眇諒空
蒙之不我構兮陳文言以遨嬉舍芳香而誰御質澄照以長辭
恣毀桀以譽堯兮冀萬福之登來駭制作於三皇兮予又勇乎
瑕疵蠹孤義之俯天兮無譬喻以詞之散餘懷而之形骸兮乃
隣睨而側頸絕千載而蘇一笑兮亦斛淚之所孕萬常不得安
居兮再元黃之紘紘諒鬼雄之弊濁兮終結愬而徒勤齎靈懇

之沉沉兮倏予到乎各言之外轉圖常而大觀兮曾不立乎一
義玉女乃召子高雲兮首琅琅其詔予汝奚隆于狂慧兮非出
離之所塗館汝以寒春之宮兮從無愁之攸居汝東游見毒龍
兮龍族曾不醉汝乎酒西見宛宛之弱妃兮又嬌倖而諛汝義
何孤而非繁兮情何了之非儔子東見童蒙兮顧戚孔神骨百
粹之美心兮祭以媚天西見彗雙兮曰禍福在子貢繚戾之淒
清兮亦伺人而間投其佐戍律兮分神化軀棲人睫兮據人齒
尸神笑逆兮肝靈怒悅神明之一霜夜秋秋而亂語何智可摧
兮何思能降龍夔夔以怒心電惶惶以收風玉水水兮无愁愁
思不可以久淫汗淫淫兮既雨戕思林兮伐智樹放聰輪兮黜
明御歸來乎歸來乎泊兮吾以寤重曰心疾之構光景聚兮屏
營寂忽无適主兮百愁往來召羣苦兮匪智匪道逢玉女兮久

游不歸慈所牽兮空首稽首禮則真兮而今而往得所門兮而
將誰與游而何歸之休而甯汎汎以湛浮道爾靡有言兮

發大心文

震且苦惱衆生某稽首盡十方三世諸佛前伏以人身難得佛
法難聞我今得少善力得生人中正像云遐未法現在欲報大
恩須發大願依經論說行是車船願是馬楫有船無楫難可到
也我自諸劫以來佛加被我佛教誨我佛憶念我我有眼根不
見耳根不聞意根不覺流轉生死旋出旋沒至於今生今生更
遲何生可待父母生我善友教我一切有情咸加被我况自諸
劫來若父若母若眷屬或生天中或生人中或生畜生中地獄
中我若不以今生坐大願船自鼓願楫盡諸後身終成蹉忽負
恩無極是謂枉得人身虛聞佛法是故欲修檀者發心爲先欲

修禱提發心爲先欲修尸羅發心爲先欲修毘黎耶發心爲先
欲修禪那發心爲先欲修般若發心爲先我今先願斷種種心
何謂種種心瞋心差別有三曰嫉惡心曰怨德心曰難忍辱心
貪心差別有三曰樂世法心曰羨慕心曰憶世法心癡心差別
有五曰善感心曰纏綿心曰疑法心曰疑因果心曰昏沈心有
境相應行心有非境不相應行心若廣分別言則有八萬四千
塵勞皆起一心我今誓發大心凡生人倫受種種惱大心菩薩
深知因果各各有故略可說脫今我今世適發善念欲八正
受卽有魔事不得成就便當知前生不狠微淺燒善友故脫令
我今世出誠實言而以愬人人反譏笑便當知我前世信根微
淺不聽它言故脫令我今生多受浮言無情淺夫或用見成言
說而成謗論便須知我前世處境享泰但能坐議不察人世一

切真實煩惱故脫令我今世於人有禮人見凌侮便須知我前
生忍辱根淺或加報復或喜我慢今迴報故脫令我今生如孩
如提純取直初而以待人大相機詐受種種惱便須知我前生
閱歷太深厚貌深中今受報故脫令我今世既招謗議復值嫌
疑難可解說便須知我前生坐於堂上身為理官但據形迹故
脫令我今世自細及巨萬事萬狀不得擇術直行如頭欲前而
足欲後便當知我前生直截如意平生處置數言可了不知它
苦故脫令我今世進身坎軻橫見貶抑便須知我前生僥取榮
利貪賂罔法不畏人王不耻爛笑故脫令我今世種種處置雖
竭仁智終無善局便須知我前生害他眷屬累其一生故脫令
我今生於世間愛樂百求無遂凡所施作垂成忽敗便須知我
前生於它若有仇若無仇一切破壞故脫令我今生遇有惡緣

未可明言便須知我前生誤作媒翳害它人故脫令我今世受
無量冤讒無量憂泣不可明言便須知我前生順遂享福過故
脫令今生遇兇人暴辱如豺虎行便須知我前生無禮以凌人
故復次諸佛我若後身仍生人倫或生此世界或生餘世界依
雜華普賢說東南西北世界東西南北四角世界上方下方世
界乃至盡毘盧遮那悔世界皆當發心而正思惟如遇它橫逆
應正思惟生安受心遇它機械應正思惟生憐他心遇他柞惡
應正思惟生度他心遇他冥頑不忠不孝不存血性於家於國
漠然無情應正思惟生感動他心遇他遏抑我嗔負我皆正思
惟而生憐他心遇他頑癡應正思惟生敬他心遇它妬忌生讓
它心遇它醜惡應正思惟生愛它心乃至見他十惡五逆亦將
我心置他胸臆而替他想生種種憐他心宥他心度他心乃至

一切施不如願於我我皆如是思惟此我夙業今坐幸已受報
已償已訖生自慶幸心復次諸佛我若後身仍生天倫若日天
子若月天子若星辰天子或生忉利天或生須欲摩天或生四
天王天或生它化自在天乃至生諸梵天乃至生五不還天生
色究竟天皆當發心憶見衆生照見衆生我生天上八於內院
值禱處佛佛已降時最先請佛說法佛涅槃時受我最後法供
如純陀事佛祐弟一當念世人不值佛世或又遭遇滅法人王
我皆衍佛法緒而以度之我生天上身有千頭頭有千舌舌有
千義氣足音宏辯才弟一當念衆生冤枉蹇蹇若忠臣若孝子
若賢婦孝女奴僕種種屈曲縲戾千幽萬隱我皆化身替他分
說而以度之我生天上威德自在尊嚴弟一當念衆生賤苦而
雲度之我生天上寂然安隱得諸三昧陀羅尼門定慧弟一當

念衆生或困色陰或困想陰種種傾倒我施安隱而以度之我
生天上壽命第一當念衆生朝有夕無哭泣相續我施壽命而
以度之我生天上安居第一當念衆生或涉大水而困濤波或
從高山跌落不得至地心怖神飛我當化身空中爲其接住而
以度之我生天上調適第一當念衆生生惡毒瘡種種苦病或
遇刀刃或落半頭時或斫手脚時或剝腸胃及兩眼時求死未
死時我皆分身而以度之我生天上潔淨第一當念衆生在於
地獄既受無量痛苦仍在沸屎受無量穢我皆不憚親往而以
度之我生天上慧照天人多聞第一當念衆生少見真聞於一
切處自疑自駭我當令其到心皆也而以度之我生天上久遠
超出因明內外五明神明第一當念衆生小聰小辨世法多聞
或困名身或困句身或困文身傾倒日夜我先化身令其成就

然後解脫而以度之我生天上春吐梅檀氣夏吐芬陀利氣秋吐蘭氣冬吐須曼那氣身長由延端正第一當念衆生現富貴那形鳩槃荼形夜迦形或人生中粗弊如畜福力輕微或生疣贅五官不全同倫譏厭已亦厭苦我當巧術而以度之我生天上八萬四千微妙侍女來相親娛著微妙衣出微妙聲或以攜手爲極樂或以相笑爲極樂當念衆生因於塵重婦欲不知厭苦復有慧根男女想陰熾盛生諸疾病種種失細境界我皆化作色身爲其成就如願然後解脫而以度之我生天上供養弟一當念貧窮衆生我以法力取龍宮寶貝或美衣食而以度之復次諸佛我若度人當發大願心先度此生父身母身眷屬身再度曠劫以來不可說不可說父身母身眷屬身又當度此世一切知識我之身又當度曠劫以來不可說不可說知識我之

身又當度曠劫以來至於此世與我有仇有怨之身乃至遍度曠劫以來至於今世若因緣若增上緣若等無間緣若所緣緣若有情而作緣若無情而作緣人所不見天眼乃見之身依首楞說十二類生各各入其類中而說法要而化導之雖有化導化身勞苦我實寂然不出於定安坐本所不離三昧身心如故凡此所願我實誓發無虛誑心所願佛加被我佛証知我佛提撕我佛成就我使我盡此一形乃至于形萬形無量形盡諸後有無凡夫障無小乘障無中乘障無外道障無魔民障無魔王障正念相續正願相續正知相續正見相續正行相續我盡諸身若毛髮若肝腦若頭目而以作供不作為報我雖化身橫盡虛空豎盡來劫作其塵沙一一沙中有一一舌一一舌中出一一音而以讚佛不能盡也又以化身豎盡來劫橫盡虛空作其

塵沙沙中一一舌中一一音而以勸人讚佛不能盡也世界
無盡佛力無盡衆生無盡一切法無盡我願亦無盡